

INUIT ATAQATIGIIT

INATSISARTUNI



Nuuk, 17. maj 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartuni ilaasortaq Aqqaluaq B. Egede, Inuit Ataqatigiit)

Apeqqut:

Kalaallit Nunatsinni namminerisamik tunngaviusunik inatsiseqalernissarput siunertaralugu suliaqarnissaq Inatsisartut 2011 ukiakkut ataatsimiinneranni Naalakkersuisunut peqqusutigineqartoq sumut killippa?

Tunngavilersuut:

Inatsisartut 2011-imi ukiakkut ataatsimiinnerannut atatillugu aalajangiiffigisassatut siunnersuuteqarpunga imatut qulequtsikkamik:

"Inatsisit tunngaviusut piareersarlugit suliarineqarnissaat aallarnisarneqalereqqullugu Inatsisartut aalajangiiffigisassaattut siunnersuut, taamaattumillu Kalaallit Nunatsinni namminerisamik tunngaviusumik inatsiseqalernissarput siunertaralugu Isumalioqatigiissitamik pilersitsinissaq Inatsisartut aalajangiutissagaat." (UKA 2011/61)

Siumup Inatsisartunut ilaasortaaitai taamanikkut siunnersuutinnut assingusumik aamma siunnersuuteqarput. (UKA 2011/72)

Siunnersuutit qulaani pineqartut Inatsisartut ukiaq taanna naammassillugit suliarivaat Inatsisinut Ataatsimiititaliap isumaqatigiittup allannguutissatut siunnersuut matuma ataani issuarneqartoq Inatsisartut aamma akuersissutigimmassuk:

"Kalaallit Nunaannut inatsisit tunngaviusut pillugit isumalioqatigiissitamik pilersitsinissaq pillugu Inatsisartut aalajangiinissaannut tunngaviusussamik nassuiaammik kingusinnerpaamik 2012-ip naanerani Inatsisartunut saqqummiussinissamik Naalakkersuisut peqquneqarput. Nassuiaammik tamatuminnga Inatsisartut oqaluuserinninnerat tunngavigalugu aalajangiiffigisassatut siunnersuummik 2013-imi ukiakkut ataatsimiinnissami suliarineqartussamik saqqummiussinissamut Naalakkersuisut peqquneqarput."